



19. marts 2019

Nal. nr./j.nr.: 2017-900-0018

All. nr./notatnr.: 62233

Sull./sagsbeh.: FH/jh

Qaanaami Utoqqaat Illuanni misissuineq pillugu nalunaaruisiaq 19. marts 2019-imeersoq

1. Aallaqqaasiut

Misissuiartortut Inatsisartut Ombudsmandianneersut 26. april 2018-imi Qaanaami Utoqqaat Illuanni siumut nalunaaruteqaqqaarlutik misissuineramik ingerlatsipput. Misissuineq naammagittaalliummik aalajangersimasumik tunngaveqarnani Ombudsmandip nalinginnaasumik ingerlatsineranut atatilugu ingerlanneqarpoq.

Misissuiartortut tassaapput siunnersortit pisortaat Lasse Risager, immikkut siunnersorti Franz Amdi Hansen aamma oqalutsi/nutserisoq Jokum Nielsen, tamarmik Ombudsmandeqarfimmi atorfeqartitaasut.

Qulequttat misissuinermi oqaloqatigiissutigineqartut ilaannaat nalunaaruisiami matumani ilanngunneqarput.

Utoqqaat Illuat aamma Avannaata Kommunia nalunaaruisiamut matumunnga missingiut pillugu oqaaseqaateqarnissaminut periarfissinneqarput. Oqaaseqaatit arlallit Utoqqaat Illuat suleqatigalugu suliarineqarsimasut Avannaata Kommuniata uannut e-mailikkut 2. januar 2019-imeersukkut nassiuppai. Oqaaseqaatit taakku nalunaaruisiamut matumunnga ilanngussami is-suarneqarput.

2. Misissuinermi inatsisitigut tunngavigisat

Ombudsmandip sulinerani inatsisitigut tunngavigisat Inatsisartut Ombudsmandiat pillugu Inatsisartut inatsisaatigut nr. 7-ikkut, 1. juni 2017-imeersukkut (matuma kingorna Ombudsmandi pillugu inatsimmik taaneqartartussakkut) aalajangersarneqarput.

Ombudsmandi Inatsisartunit qinerneqartarpoq, tak. Ombudsmandi pillugu inatsimmi § 1, imm. 1, suliaminilli ingerlatsinermini Inatsisartunut attuumassuteqartuunani, tak. § 6, imm. 1.

Ilaatigut Namminersorlutik Oqartussat kommunillu ataanni pisortat ingerlatsiviisa ilaat tamarmik Ombudsmandip sulinerani pineqartunut ilaatinneqarput, tak. Ombudsmandi pillugu inatsimmi § 7, imm. 1, oqaaseqatigiit siulliit.

Ombudsmandip suliassaa tassaavoq oqartussaasut inuilluunniit Ombudsmandip sulinerani pineqartunut ilaatinneqartut inatsisinik atuuttunik unioqutitsisumik iliuuseqarnerisut imaluunniit suliassaminnik ingerlatsinerminni allatut iliorlutik kukkussuteqarnermut sumiginnaanermulluunniit pisuussuteqarnerisut nakkutigissallugu, tak. Ombudsmandi pillugu inatsimmi § 19, imm. 1. Ombudsmandi isornartorsiuissinnaavoq, inassuteqaateqarsinnaalluni suliarlugu pillugu paasinninnerminik saqqummiussisinnaalluni, tak Ombudsmandi pillugu inatsimmi § 20. Ombudsmandip suliamik misissuinerata takutippagu pisortat ingerlatsivianni annertunerusumik kukkussuteqartoqarsimanissaa imaluunniit sumiginnaasoqarsimanissaa ilimagisariaqartoq, Ombudsmandi suliaq pillugu Inatsisartut Inatsisinut Ataatsimiititaliaannut tamatumunngalu peqatigitillugu Naalakkersuisunut imaluunniit kommunalbestyrelsimut nalunaaruteqassaaq, tak. Ombudsmandi pillugu inatsimmi § 23.

Ombudsmandi pillugu inatsimmi § 16-imi oqaaseqatigiinni siullerni aalajangersarneqarpoq paaqqinniffiit suliffeqarfiilluunniit Ombudsmandip sulinerani pineqartunut ilaatinneqartut Ombudsmandip misissorsinnaagai. Taamatut misissuinermut atatillugu – Ombudsmandi pillugu inatsimmi §§-ini 19-imi 20-milu aalajangersarneqartut saniatigut – Ombudsmandip pissutsit paaqqinniffiup aaqquissuusaaneranut ingerlanneqarneranullu tunngasut kiisalu

pissutsit paaqqinniffimmik atuisut pineqartarnerannut taakkulu pillugit ingerlatanut tunngasut inuppalaartumik misigittartumillu isiginnittaaseq aallaavigalugu naliliiffigisassavai, tak. Ombudsmandi pillugu inatsimmi § 16-imi oqaaseqatigiit aappaat.

3. Misissuinerup piareersarneqarnera ingerlanneqarneralu

Utoqqaat Illuat misissuinissaq pillugu oqarasuaatikkut 4. august 2017-imi kalerrinneqarpoq, misissuinissarlu pillugu allakkatigut 26. februar 2018-imeersutigut sukumiinerusumik ilisimatinneqarluni.

Paaqqinniffik najugaqartullu pillugit Utoqqaat Illuannit allakkatigut paasissutissanik assigiinngitsunik misissuinissaq sioqqullugu tigusaqarpunga.

Sulisut, najugaqartut ilaqutaasullu misissuinissaq pillugu allakkatigut siumut ilisimatinneqarput, ilanngullugulu ilisimatinneqarlutik misissuiartortunik oqaloqateqarnissamut periarfissaqartut.

Misissuinermi Utoqqaat Illuanni aqutsisut, tassaasut immikkoortorta qarfimi aqutsisuugallartoq tassungalu tullersortaagallartoq, misissuiartortut oqaloqatigaat. Misissuiartortut tamatuma saniatigut sulisut tallimat najugaqartullu tallimat ataasiakkaarlugit oqaloqatigaat.

Misissuiartortut taamatutaaq Utoqqaat Illuata initai misissuataarpaat.

4. Utoqqaat Illuat pillugu ataatsimut oqaatigisassat

Utoqqaat Illuat Avannaata Kommuniata ataani kommunip utoqqarnik paaqqinniffiutigaa.

Misissuinerup nalaani Utoqqaat Illuanni aalajangersimasumik najugaqartut 20-upput oqilisaassillunilu inissat marluullutik.

5. Ombudsmandip pingaarnersutigit naliliinera

Pingaarnertut isumaqarpunga Utoqqaat Illuat najugaqartunut toqqissisimantunik avatangiiseqartitsisoq. Taamatutaaq isumaqarpunga Utoqqaat Il-

luanni aqutsisut sulisullu suliassaminnik tunniusimallutik ilumoorlutillu isumaginnittut.

Najugaqartut tallimat misissuiartortunit oqaloqatigineqartut ersersippaat Utoqqaat Illuanni najugaqarnertik nuannaralugu.

Misissuiartortulli aamma ilisimatinneqarput Utoqqaat Illuata 2018-imi martsioqquullugu isumaginninnermik suliassaqaarfimmi pissaanermik atuineq pillugu malittarisassat atuuttut eqqumaffigisimangikkai.

Isumaqaarpunga taamaaliornikkut najugaqartut inatsisitigut illersugaanerataalajangiisuusumik sanngiillisinneqarsimasoq. Tamanna akuerineqarsinnaanngitsutut isorisarialerujussuartullu isigaara. Tamanna tulliuuttuni imm. 6-imi sukumiinerusumik allaaserineqarpoq.

Pissutsit allat arlallit oqaaseqaateqarnissannut aamma pissutissaqalersippaanga. Taakku tulliuuttuni imm. 7-imit 10-mut allaaserineqarput.

6. 2018-imi martsioqquullugu pissaanermik atuineq pillugu inatsimmik ilisimasaqannginneq

6.1. 26. februar 2018-imi allakkanni Utoqqaat Illuat qinnuigaara ilaatigut najugaqartunut pissaanermik atuinermut paaqqinniffiup najoqqutai 2017-imi pissaanermik atuisimanermut paaqqinniffiup nalunaarutai uannut nassuteqqullugit.

E-mailikkut 21. marts 2018-imeersukkut Utoqqaat Illuat ilaatigut akivoq sulisut najugaqartunut pissaanermik atuineq ajortut. E-mailimi atuarneqarsinnaavortaaq Utoqqaat Illuanni aqutsisut sulisullu pissaanermik atuisimanermik nalunaarutiginninnissamut immersuivissaqartoq aatsaat ilisimalersimagaat 2018-imi martsip ulluisa 7-iannit 14-iannut Ilulissani isumasioqatigiinnermi Utoqqaat Illuata aqutsisuugallartoq peqataammat. Tamatuma malitsigisaanik nalunaaruteqarluni immersugassat Utoqqaat Illuata 20. marts 2018-imi atulersimavai.

26. april 2018-imi misissuinermi Utoqqaat Illuata immikkoortorta qarfirmi aqutsisorigallagaata itisiliilluni nassuiaatigaa Utoqqaat Illuanni aqutsisut sulisullu inatsisiliortoqarsimanera 2018-imi martsioq qullugu ilisimasaqarfigisimangikkaat. Immikkoortorta qarfirmi aqutsisuugallartup – qaammatit qulingiluat eqqaassangikkaanni 2013-imiit Utoqqaat Illuanni immikkoortorta qarfirmi aqutsisuugallartut atorfeqarsimasup – aamma ilisimatitsissutigaa piffissami tamanna sioqullugu aamma pisoqartarsimasoq pissaanermik atuneq pillugu inatsimmi malittarisassat malillugit nalunaarutigineqartussaasimagaluartunik, kisiannili nalunaarutigineqarsimangitsunik.

Utoqqaat Illuata immikkoortorta qarfirmi aqutsisorigallagaata taamatuttaaq ilisimatitsissutigaa 20. marts 2018-ip kingorna pissaanermik atuisoqarsimasoq, tamatumalu malitsigisaanik pissaanermik atuneq pillugu inatsimmi piumasarineqartut nalunaaruteqarluni immersugassanik immersuisoqarsimalluni. Pisuni taakkunani tamani najugaqartoq aalajangerlugu tigummineqarsimavoq nangia taarserneqarsinnaaniassammat.

Najugaqartut misissuiartortut oqaloqatigisaasa tallimat tamarmik ilisimatitsissutigaa Utoqqaat Illuanni sulisunit timikkut pissaanermik atuinermik misigisaqarsimangisaannarlutik.

6.2. Paasisinnaavara utoqqaat illuanni pisoqarsinnaasarmat najugaqartoq pisariaqartumik paaqqutariniarlugu isumassorniarlugulu pinngitsaaliineq pisariaqalersinnaalluni, assersuutigalugu najugaqartoq puiguttorsimasoq anartarfiliarsinnaangitsorlu nangilerneqarumangippat. Kisianni soorunami aalajangiisuvoq utoqqaat illuanni sulisut najugaqartunut taamaallaat inatsisikkut akuerisaasunik pissaanermik atuippata, pissaanermillu atuneq tamanna pippat najugaqartut inatsisikkut illersugaanerat naapertuuttumik isiginiarlugu.

Utoqqaat illuini najugalinnut sulisut pissaanermik atuisinnaanerat pissaanermik atuneq pillugu inatsimmi (isumaginninnermik suliassa qarfirmi pissaanermik atuneq pillugu Inatsisartut inatsisaanni nr. 1-imi, 21. november

2013-imeersumi kingusinnerusukkut allannguutitalimmi)¹ malittarisassaqaar-tinneqarpoq. Inatsimmi tassani najoqqutassatut tunngaviit pingaernerit ilaat eqqartullatsiassavakka. Inatsisip sukumiinerusumik allaaserineqarnera eqqarsaatigalugu "Isumaginninnermik suliaassaqaarfimmi pissaanermik atuineq pillugu Inatsisartut inatsisaannut ilitersuut – immikkoortoq III inersimasut pillugit" 2013-imi novemberimi taamanikkut Isumaginninnermut Inatsisinik Atuutsitsinermullu Naalakkersuisoqarfiusumit saqqummersinneqartoq, Naalakkersuisullu nittartagaanni www.naalakkersuisut.gl-imi aaneqarsinnaasoq, innersuussutigissavara.

Oqaatigaara utoqqaat illuanni najugaqartut tamarmik pissaanermik atuineq pillugu inatsimmut ilaatinneqanngimmata. Taamaalilluni pissaanermik atuineq pillugu inatsisip ilaa inunnut 18-ileereersimasunut tunngasoq, taamaallaat periarfissiivoq, inuit ilaannaannut, tarnikkut pissutsimikkut annertuumik ataavartumillu piginnaanikillisimasunut pissaanermik atuisinnaanissamut, sukumiinerusumik pissaanermik atuineq pillugu inatsimmi § 3 takuuk. Pisut apeqqutaatillugit tamatumani ilaatigut pineqarsinnaapput utoqqaat illuanni najugaqartut puigortunngorsimasut.

Pissaanermilli atuineq pillugu inatsit aalajangersakkanik arlalinnik imaqarpoq inuit, inatsit malillugu iliuuseqarfigineqarsinnaasut ataqqinnittumik inatsisitigullu illersugaaneq eqqarsaatigalugu illersorneqarsinnaasumik pineqar-nissaannik qulakkeerinneqataasunik.

Siullermik pissaanermik atuineq pillugu inatsimmi aalajangersarneqarpoq inuk pineqartoq nammineq piumassutsimik peqataatinniarlugu kommuni sumiiffigisaq periarfissanik tamanik atueqqaarsimassasoq, tak. pissaanermik atuineq pillugu inatsimmi § 30, imm. 1. Taamatuttaaq pissaanermik atuineq anguniakkamut naleqqiullugu imminnut naapertuuttumik atsikkutigiissap-pat, tak. § 30, imm. 2, pissaanermillu atuineq sapinngisamik mianersortu-mik sapinngisamillu sivikinnerpaamik aamma pineqartumut allanullu najuut-

¹ Tamatuma saniatigut naatsorsuutigineqartariaqarpoq pisut immikkut ittut ilaanni qaqutiginnaq pissaanermik atuisoqarsinnaammat allatut ajornartumik illersuisariaqalerneq aamma illersuisin-naatitaaneq pillugit tunngaviit najoqqutaralugit.

tunut sapinngisamik mianerinnilluni pissalluni, taamaalilluni pisariaqanngitsumik kanngunarsaasoqassanngimmat akornusiisoqaraniluunniit, tak. § 30, imm. 3.

Aappaattut pissaanermik atuineq pillugu inatsit taamaallaat periarfissiivoq pinngitsaaliinerit inatsimmi erseqqissumik taaneqartut atorneqarnissaannut. Akuliunnerit tamakku qaqugu qanorlu pissanersut pissaanermik atuineq pillugu inatsimmi allaaserineqarput. Assersuutigalugu nangimik taarsiisoqassatillugu aalajangersimasumik tigungminninnermut ikiuutitut atortunik atuisoqaqqusaanngilaq, soorlu aamma inuk aalajangerlugu tigungmininneq aat-saat pisinnaasoq pineqartup isumassorneqarnissaata isumaginissaanut tamanna pisariaqarluinnartutut isigineqarpat. Tamanna pissaanermik atuineq pillugu inatsimmi § 33-mi, pisuni eqqiluisaarnermut tunngasuni pissaanermik atuineq pillugu sukumiinerusunik malittarisassaqaqtitsiviusumi, atuarneqarsinnaavoq:

§ 33. Kommunimi sumiiffigisami kommunalbestyrelsi qaqtigut aalajangiisinaavoq najugaqarfittut ulluuneraniluunniit neqeroorummi pisortaq, imaluunniit sulisoq, pisortamit taamatut iliornissamut piginnaatinneqartoq inummik aalajangersimasumik tigungminnilluni pissaanermik atuisinnaasoq, inuttut eqqiluisaarnermut atatillugu pineqartup isumassorneqarnissaata isumaginissaanut tamanna pisariaqarluinnartutut isigineqarpat. Inuttut eqqiluisaarnermut atatillugu pissaanermik atainerup siunissami pinngitsoornissaa peqatigisaanik qulakkeerniarneqassaaq.

Imm. 2. Imm. 1 naapertorlugu timikkut pissaanermik atuineq eqqiluisaarnermik pisuni tulliuttuni akuerineqarsinnaassaaq:

- 1) Kigutininik saliineq.
- 2) Unngiarneq.
- 3) Qulinneq, uffarneq atisanillu taarsiineq.
- 4) Nujaajartinneq kukiartinnerlu.
- 5) Nangernik nalequttanillu taarsiineq.
- 6) Amerissaaneq.
- 7) Ulussat iluini qarngullu iluani nerisat sinnikuinik peersineq.

Imm. 3. Kommunalbestyrelsip aalajangiinerani eqqiluisaarnermi pissutsit piviusut suut aalajangiinermi pineqarnersut erseqqissaatigineqassaaq.

Imm. 4. Aalajangersimasumik tigummininnermut ikiuutitut atortunik atuisoqas-sanngilaq, aamma aalajangersimasumik tigumminneriaaseq taamatullu iliornik-kut anguniagaasoq imminnut naleqqiullutik atsikkutigiissallutik.

Imm. 5. Aalajangersagaq manna naapertorlugu timikkut pissaanermik atuineq piffissami qaammatit pingasut tikillugit sivisussusilimmi akuerineqarsinnaavoq. Kommunalbestyrelsi piffissamik sivitsuisinnaavoq, qaammatinilli arfinilinnik sivi-sunerunngitsumik, pineqartumi eqqiluisaarnikkut pissutsit pitsaanerulersinniarlu-git periutsit allat peqatigisaanik ineriartortinneqassammata, tak. imm. 1, oqaa-seqatigiit aappaat.

Imm. 6. Inuup imm. 1 naapertorlugu siusinnerusukkut aalajangiiffigineqareersup tarnikkut pissutsimigut annertuumik ataavartumillu piginnaasakillisisanera suli ajorseriaateqaqqippat, pisuni eqqiluisaarnermut tunngasuni aalajangersimasumik tigumminilluni timikkut pissaanermik atuinissamut akuersissut piffissamut qaammatit pingasut tikillugit atuuttussa q pillugu aalajangiisoqaqqissinnaavoq, piffissaq qaammatit 6 tikillugit sivitsorneqarsinnaalluni.”

Pissaanermik atuineq pillugu inatsit pingajuattut sulianik suliarinnittarneq pillugu piumasaqaatinik assigiinngitsunik imaqarpoq, suliassat suliarineqar-tarnerat pillugu inatsit (pisortat ingerlatsineranni suliassat suliarineqar-tarnerat pillugu Inatsisartut inatsisaat nr. 8, 13. juni 1994-imeersoq kingu-sinnerusukkut allannguutitalik) malillugu piumasaqaatinut tapertaasunik.

Assersuutigalugu eqqiluisaarnermut atatillugu aalajangerlugu tigumminnin-neq kommunimi sumiiffigisami kommunalbestyrelsip aalajangiineratigut pi-sartussaavoq, pissaanermik atuineq pillugu inatsimmi § 33 siuliani issuar-neqartoq naapertorlugu. Kommunalbestyrelsip aalajangiineranut tunngavis-satut ilaatigut iliuusissat eqqarsaatigineqartut pillugit ilaquuttat taamaat-toqarpallu nakkutilliisup oqaaseqaataat pigineqassaaq, pissaanermik atuineq pillugu inatsimmi § 41, nr. 4 naapertorlugu.

Kommunalbestyrelsip aalajangiinera tamatuma kingornatigut Isumaginnin-nermi Naammagittaalliuteqartarfimmut naammagittaalliutigineqarsinnaa-voq. Tamanna pissaanermik atuineq pillugu inatsimmi § 48, imm. 1-ikkut aalajangersarneqarpoq.

Tamatuma saniatigut oqaatigineqareersutut pissaanermik atuinerit suuga-luurtulluunniit kommunimi najugarisami kommunalbestyrelsimut Naalakker-suisunullu nalunaarutigineqartartussaapput. Nalunaaruteqartarnermut ma-littarisassat ilaatigut pissaanermik atuineq pillugu inatsimmi § 53-imi taku-neqarsinnaapput.

6.3. Misissuinermi oqaloqateqarnerit aallaavigalugit misissuiartortut pi-ngaarnertut misigisimapput Utoqqaat Illuata aqutsisui sulisullu tamarmiulla-tik sapinggisamik najugaqartunut pissaanermik atuinnginnissaq eqqumaffi-gisorujussuugaat. Isumaqarpungali eqqumaffiginninneq tamanna suliassa-qarfimmi malittarisassanik naammaginantumik ilisimasaqarnermik tunnga-veqanngitsoq.

Suliamik misissuineri tunngavigalugu erseqqinnerusumik isummerfigisin-naanngilara pisuni aalajangersimasuni suni Utoqqaat Illuanni pissaanermik atuineq pillugu inatsimmi malittarisassanut akerliusumik iliuuseqartoqartar-simasinnaanersoq. Tamatumunnga ilaatigut pissutaavoq Utoqqaat Illuata paasissutissiissutigineqartut malillugit najugaqartunut pissaanermik atuineq aatsaat 20. marts 2018-imit nalunaarsortalermagu.

Oqaatigaara utoqqaat illuanni pissaanermik atuinermik pingaarnerusutigit nakkutilliinermut – kommunimit, Naalakkersuisunit Ombudsmandeqarfim-miillu – eqqortumik nalunaarutiginnittoqartarnissaa aalajangiisuummat. Taamaalilluni pissaanermik atuinermik nalunaaruteqartarnek Utoqqaat Il-luanni najugaqartut inatsisitigut illersugaanerannik qulakkeerinneqataavoq.

Paasissutissat misissuiartortunit pissarsiarineqartut tunngavigalugit taa-maattoq inerniliuttariaqarpara Utoqqaat Illuata piffissami sivisuumi pissaa-nermik atuineq pillugu inatsimmi malittarisassat eqqumaffigisimanngikkai, i-laatigullu Utoqqaat Illuanni najugaqartunut malittarisassat taakku unioqqu-tinneqartarsimallutik.

Ataatsimut isiginnillunga isumaqarpunga pissutsit taamaanneratigut najuga-qartut inatsiseqartitsinikkut innarlitsaalineqarnerat aalajangiisuusumik san-

ngiillisinneqarsimasoq. Tamanna akuerineqarsinnaanngitsutut isorisarialeru-jussuurtullu isigaara.

Isumaqarpungattaaq taamaaliornikkut annertuumik kukkussuteqartoqarlunilu sumiginnaasoqarsimasoq. Taamaattumik Ombudsmandi pillugu inatsimimi § 23 malillugu Avannaata Kommunianni kommunalbestyrelsi, kommunimi utoqqarnik paaqqinniffinnut qullerpaatut akisussaasuusoq, Inatsisartunilu Inatsisinut Ataatsimiititaliaq tamatuminnga nalunaarfigaakka. Tamatuma saniatigut Isumaginninnermut Inatsisunik Atuutsitsinermullu Naalakkersuisoqarfik, pissaanermik atuneq pillugu inatsimmik suliassaqarfimmut oqartussaasuusoq, suliaq pillugu nalunaaruteqarfigaara.

Inassuteqaatigaara Utoqqaat Illuata sulisut tamarmik pissaanermik atuisar-neq pillugu inatsimmi malittarisassanik pisariaqarneratut annertutigisumik ilisimasaqarnissaat qulakkeerniarlugu suliniutigissagaa.

7. Aalajangiinerit pissaanermik atuinermut tunngavittut

Misissuinermi pissaanermik atuinissaq sapinngisamik pinngitsoorniarneqartartoq misissuiartortut sulisumit ilisimatinneqarput, kisiannili ukiuni arlalinnortuni nangit taarserneqarnerinut atatillugu najugaqartoq ataaseq aalajangerlugu tigummineqartariaqartarsimasoq, taamaaliortoqanngippat najugaqartoq sulisunut nukimminik atuiartarmat. Pisut tamakku nalunaarsorneqarsimanngillat.

Sulisulli aamma ilaqarput nangit taarserneqarnerinut atatillugu najugaqartut aalajangerlugit tigummineqartariaqarsimaneramik misigisaqarsimanngitsunik.

Sulisuma ilaata Utoqqaat Illuata immikkoortortaqarfimmi aqutsisorigallagaa misissuinerup kingornatigut sianerfigaa, najugaqartullu ataatsip taassuma aalajangerlugu tigummineqartariaqarsimamillu paasissutissat misissuiartortut pissarsiarisimasaat oqaluttuaralugit. Utoqqaat Illuata immikkoortortaqarfimmi aqutsisorigallagaata paasissutissat taakku iluoornerarpari. Utoqqaalli Illuata immikkoortortaqarfimmi aqutsisorigallagaata kommuni tamanna pillugu aalajangiisimamersooq ilisimanngilaa.

Siuliani imm. 6.2-mi oqaatigineqartutut pissaanermik atuineq pillugu inatsimmi § 33, imm. 1-imi aalajangersarneqarpoq eqqiluisaarnermut atatillugu inummik aalajangerlugu tigumminninneq kommunimi najugarisami kommunalbestyrelsip aalajangiineratigut pisassasoq.

Eqqortussarli anguniarlugu oqaatigaara pissaanermik atuineq pillugu inatsimmi takuneqarsinnaangimmat kommunalbestyrelsip aalajangiinera allakkatigut nalunaarutigineqassanersoq. Inatsisilerinermulli tunngatillugu allaatigisani nalinginnaasumik naatsorsuutigineqartarpoq ingerlatsinermi ileqqorissaarnerup ilagigaa ass. pissaanermik atuinissaq pillugu akuliuffiunerusumik aalajangiinerit allakkatigut nalunaarutigineqartarnissaat.

Niels Fengerip allallu atuakkianni "Forvaltningsret"-imi (2018-imeersumi), quppernerit 628 tullialu aamma Karsten Revsbechip allallu atuakkianni "Forvaltningsret – Sagsbehandling"-imi, arfineq aappassaanik naqitertinneqartumi (2014-imeersumi), qupperneq 297 ilaatigut innersuussutigaa.

Inassuteqaatigaara Utoqqaat Illuat najugaqartunut pissaanermik atuissatillugu, pissaanermik atuineq pillugu inatsit tunngavigalugu pisariaqarneratut aalajangiisoqareersimanissaa Utoqqaat Illuata qulakkeertassagaa.

8. Pissaanermik atuinermik nalunaarutiginninneq

8.1. Siuliani imm. 6-imi oqaatigineqartutut misissuiartortut misissuinissaq sioqqullugu Utoqqaat Illuannit ilisimatinneqarput Utoqqaat Illuata pissaanermik atuinermik nalunaarsorneqarnissaanut nalunaaruteqarluni immersugassaq aatsaat 20. marts 2018-imi atulersimagaa. Aqutsisuugallartup misissuinerimi paasissutissiissutigaa immersugassaq tamanna sioqqullugu marloriarluni atorneqarsimasoq, nalunaaruteqarfissalli e-mailikkut nassitsivissamut immersugassami taaneqartumut nassiunneri pisuni marlunni tamani iluatsissimangitsoq. Misissuiartortut immersugassat immersorneqarsimasut marluk taakku assilinerinik pissarsipput, taakkulu tulleriinneri malillugit 28. marts 2018-imi aamma 18. april 2018-imi ullulernerqarsimapput. Immersugassani tamani najugaqartoq taanna pineqarpoq.

Pissaanermik atuinermik nalunaaruteqartarneq pillugu malittarisassat ilaati-gut pissaanermik atuineq pillugu inatsimmi § 53-imi takuneqarsinnaapput:

“§ 53. § 36 naapertorlugu najugaqarfissatut neqeroorummut tigutinneq pissaanermillu atuinerit assignngitsut tamarmik, ilanngullugit §§ 30-35 naapertorlugit pineqaatinut atatillugu pissaanermik atuinerit, najugaqarfittut neqeroorummit nalunaarsorneqassapput, kommunimilu sumiiffigisami kommunalbestyrelsimut Naalakkersuisunullu nalunaarutigineqassallutik.

Imm. 2. Immikkoortoq III naapertorlugu nalunaarsuineq nalunaaruteqarnerlu pissaq nalunaaruteqarnermut immersugassat immikkut ittut Naalakkersuisunit suliarineqartut atorlugit.”

Immersugassat marluk, assilineri misissuiartortut pissarsiarisaat, aalajangersakkamut tassunga innersuussinertaqanngillat, kisiannili meeqqanik inuusuttunillu kiisalu annertuumik innarluutilinnik ulloq unnuarlu paaqqinniffiit pillugit Namminersornerullutik Oqartussat nalunaarutaannut nr. 64-imut, 29. december 1994-imeersumut (ulloq unnuarlu paaqqinniffiit pillugit nalunaarummut) innersuussisoqarluni.

Ulloq unnuarlu paaqqinniffiit pillugit nalunaarut siusinnerusukkut pissaanermik atuineq pillugu kapitalimik imaqarpoq, kapitalili taanna pissaanermik atuineq pillugu inatsimmi § 59, imm. 2, tak. imm. 1, naapertorlugu atuukunnaarsinneqarpoq pissaanermik atuineq pillugu inatsit 1. december 2013-imi atuutilermat. Naalakkersuisut immersugassamik tamatuma kingornatigut suliaqarput pissaanermik atuineq pillugu inatsimmi malittarisassat malilugit nalunaarutiginninnermi atorneqartartussamik. Immersugassat taakku Naalakkersuisut nittartagaanni www.naalakkersuisut.gl-imi aaneqarsinnaapput.

Taamaalilluni Utoqqaat Illuata nalunaarutiginninnermi immersugassaq pisolqalisimasoq atorsimavaa.

*Inassuteqaatigaara Utoqqaat Illuata pissaanermik atuisimanermik nalunaa-
ruteqarnermi immersugassat atuuttut atortassagai taakkulu tiguisussumut
eqqortunut apuunnissat qulakkeertassagaa.*

8.2. Nalunaaruteqarnermi immersugassat marluk immersorneqarsimasut
siuliani imm. 8.1-imi oqaatigineqartutut misissuiartortut misissuinerminni
Utoqqaat Illuannit pissarsiai misissuataarpakka.

Nalunaaruteqarnermi immersugassaq 28. marts 2018-imeersoq oqaaseqaa-
teqarnissannut immikkut pissutissaqalersitsivoq. Immersugassap immersor-
neqarsimasup ilaatigut imarai najugaqartup aqqa, sulisut peqataasimasut
aqqi, pissaanermik atuinerup qanga pisimane tamatumalu sivilissusia
pillugit paasissutissat, soorlu aamma pissaanermik atuineq pillugu immik-
koortumi x-iliivissani "Aalajangerlugu tigummineqarpoq" x-ilerneqarsima-
soq. Immersugassamili "Qanoq pisoqarnerata allaaserinera (pissaanermik
atuineq sioqqullugu pineratalu nalaani pisut) sapinngisamik naatsumik er-
seqqissumik pisut pinerattut allanneqassapput" najugaqartup peqqissusia
pillugu oqaaseqaatit assigiinngitsut taamaallaat taaneqarsimapput. Immer-
sugassami tassani immersugassaniluunniit allani taamaalilluni qanorpiaq
pisoqarsimanersoq sukumiinerusumik nassuiaatigineqarsimanngilaq.

Isumaqarpunga pissaanermik atuineq sioqqullugu kingornatigullu qanorpiaq
pisoqarsimanerata sukumiinerumik allaaserineqarnera pingaarutilerujussuu-
soq, pissaanermik atuineq inatsimmik unioqqutitsinani pisimansoq kingu-
sinnerusukkut nalilerneqarsinnaassappat.

*Inassuteqaatigaara nalunaaruteqarnermi immersugassat siunissami peqqis-
saartumik immersorneqartarnissat Utoqqaat Illuata qulakkiissagaa.*

*Ilanngullugu inassuteqaatigaara Utoqqaat Illuata Avannaata Kommuniani i-
ngerlatsivik suleqatigalugu pingaarnertut Utoqqaat Illuanni aqutsisut sulisul-
lu pissaanermik atuineq pillugu inatsimmi nalunaarutiginnittarnermik malit-
tarisassat pillugit pisariaqartunik ilisimasaqarnissat qulakkiissagaa, kiisalu*

tamatumunnga attuumassutilimmik ilinniartitseqqinneq pisariaqarneratut annertutigisumik isumagissagaa.

9. Matumi silarlermi akkittaammik atuineq

Misissuinermi Utoqqaat Illuata ilaani paaqqutarineqarnissamik pisariaqartit-sinerpaat najugaqarfigisaanni matu silarleq siusinnerusukkut akkittaateqar-simagaluartoq misissuiartortut ilisimatinneqarput. Akkittaat ikkunneqarsi-mavoq najugaqartoq puigortunngorsimasoq nammineerluni anisannginnias-sammat. Akkittaat kingusinnerusukkut peerneqarsimavoq, misissuinerullu nalaani matup qulaa'tungaani putut sisamat qinnerit ikkusimaffigisimasaat sulisillutik.

Utoqqaat Illuanni aqutsisut ilisimatitsissutigaa akkittaat ikkunneqarsimasoq sulisoqatigiinni aalajangerneq malillugu. Aalajangiinermut tamatumunnga kommuni peqataatinneqarsimannigilaq.

Utoqqaat Illuanni matut silarliit ilaanni akkittaateqarneq – misissuiartortu-nut oqaluttuarineqartutut – pissutsit apeqqutaatillugit pissaanermik atuineq pillugu inatsimmi aalajangersarneqartutut "matumik ammaassutitut immik-kut ittutut" isigineqarsinnaavoq. Pissutsit taamaappata ikkussinermi sule-riaatsit pissaanermik atuineq pillugu inatsimmi aalajangersarneqartut malin-neqartussaapput. Taakkunatigut ilaatigut takuneqarsinnaavoq kommunal-bestyrelsi aalajangigassarigaa matunik ammaassutinik immikkut ittunik a-tuisoqassanersoq.

Matunik ammaassutit immikkut ittut pillugit pissaanermik atuineq pillugu i-natsimmi aalajangersakkat inatsimmi § 31-mi, imm. 4-6-imi, § 41-mi, § 48-mi § 52, imm. 1-imilu takuneqarsinnaapput imatullu oqaasertaqarlutik:

"§ 31. [...]

Imm. 4. Najugaqarfittut ulluuneraniluunniit neqeroorummi pisortap, imaluunniit sulisup, pisortamit taamatut iliornissamut piginnaatinneqartup matunik ammaas-sutit immikkut ittut inummumut ataatsimut arlaqartunulluunniit atorsinnaagai kom-munalbestyrelsi aalajangiisinnaavoq, imaappat

- 1) inuup inuilluunniit arlallit najugaqarfittut ulluuneraniluunniit neqeroorummik qimatsinermigut/qimatsinermikkut timikkut annertuumik ajoqusernissamut immi-
minut allanilluunniit ulorianartorsiortitsilernissaa aarlerinaateqarpat, aamma
- 2) aarlerinaatip tamatuma pinngitsoortinnissaanut pisuni ataasiakkaani pissutsit
tamanna pisariaqarluinnartippassuk, aamma
- 3) inatsimmi periarfissat sinneri kinguneqanngitsumik atorneqareersimappata.

Imm. 5. Imm. 4 naapertorlugu matunik ammaassutitut immikkut ittunut ilaap-
put matup tigummivii marloqiusat, matumik ammaanissamut marloriarluni toor-
sineq assigisaallu. Iliuserisaq imatut matumik parnaarinnissutaassanngilaq, pi-
neqartulli killilersugaanani ingerlasinnaaneranut atatillugu kinguarsaataassalluni,
taamaasilluni sulisut maluginiarsinnaassammassuk pineqartoq anisoq.

Imm. 6. Imm. 4 naapertorlugu iliuserisaq aallartinneqarpat, najugaqartut killi-
lersugaanatik ingerlasinnaaneratik mianeriniarlugu matumi kalerrisaarummik ik-
kussisoqassaaq, taamaasilluni najugaqartut matumik ammaassummik immikkut
ittumik namminneq atuisinnaanngitsut matumik ammaanissamut pisariaqartita-
minnik ikiorneqassammata. Najugaqartut imm. 4 naapertorlugu iliuserinninner-
mut ilaasut, aatsaat anitsaaliorneqarsinnaapput § 34-mi aalajangersagaq tama-
tuma peqatigisaanik atorneqarpat.

[...]

§ 41. §§ 31, 33, 34 aamma 35 naapertorlugit kommunalbestyrelsi aalajangi-
neritut tunngavittut tulluittut pigineqassapput:

- 1) piginnaanikillineq pillugu suliamut attuumassuteqartumik uppersaati-
pisariaqartinneqartut,
- 2) pineqaatit aallartinnissaat pillugu aalajangiisoqarnissaa siunniunneqartinnagu
isumaginninnikkut perorsaalluni ikiunneq paaqutarinninnerlu pillugit paasissu-
tissat,
- 3) piffissaq qanoq siviutigisoq pineqaatit pisariaqarfissaattut naatsorsuutigine-
qartoq pillugu paasissutissat, aamma
- 4) pineqaatit eqqarsaatigineqartut pillugit ilaqtat taamaattoqarpallu nakku-
tilliisup oqaaseqaataat.

[...]

§ 48. §§ 31, 33, 34, 35, 36, imm. 2, 38, 39, imm. 2 aamma § 42, imm. 3 naa-
pertorlugit kommunalbestyrelsi aalajangiineri Isumaginninnermi Naammagit-

taalliuuteqartarfimmut apuunneqarsinnaapput Isumaginnittoqarfiup aqunneqarnera aaqqissuussaanelalu pillugit Inatsisartut peqqussutaat malillugu.

Imm. 2. Inuk aalajangiinermi pineqartoq nammineq naammagittaalliuuteqarsinnaangippat, uiusup nuliaasulluunnit, ilaqquttap, nakkutilliisup imaluunniit allap inummut pineqaammik pineqartumut sinniisup kommunalbestyrelsip aalajangiinera naammagittaalliuutigisinnaavaat.

[...]

§ 52. Suliani pineqaatit § 31, imm. 1, § 31, imm. 4 aamma § 34 naapertorlugit aallartinneqarfigisaanni, pineqaatip atorneqarnerata ingerlaqqinnissaa kommunimit ataavartumik nalilersoqqinneqartassaaq, pineqaatillu aallartinneqarnissaanik kommunalbestyrelsip aalajangiineraniit kingusinnerpaamik qaammatit arfineq pingasut qaangiutsinnagit nalilersoqqinneqassalluni.

[...]”

Tassani aamma ilaavoq iliuutsit nalunaarsorneqarlutillu kommunimut najugarisamut Naalakkersuisunullu nalunaarutigineqartartussaammata. Tamanna pissaanermik atuineq pillugu inatsimmi § 53-imi, imm. 1-imi, § 55-imi § 57-imilu sukumiinerusunik malittarisassaqaartinneqarpoq.

Pissaanermik atuineq pillugu inatsit piareersarlugu suliani inatsisissatut siunnersuummi § 31 pillugu immikkut nassuiaatini ilaatigut oqaatigineqarpoq:

“Imm. 5

Parnaarsaativittut atortunik atuisoqaqqusaanngilaq. Aqqusinertigut angallannermi pissutsit ulorianartut atuussinnaapput, pinngortitami nunaminertat pineqartup tamarfigisinnaasai immikkut ittuusinnaapput, imaluunniit silap pissuserisinnavaai (isserujussuarnera kiarujussuarneraluunniit) atortunik taakkuningga atuinisamat tunngavissiisinnaasut, allat annikinnerusumik akuliuffiusut iluatsinngitsumik misilinneqareersimappata.

Taamaalilluni iliuutsimik taama annertutigisumik akuliuffiusumik matumik amaassutitut immikkut ittutut ittumik iliuuseqalertigani, iliuutsinik annikinnerusu-

mik akuliuffiusunik, soorlu inunnt kalerrisaarutunik sumiiffissiutinillu atuinerup misiliisoqareersimanissaata piomasaaqatiginera, matumut silarlermut matunik ammaassutunik immikkut ittunik atuinissamut periarfissanut allannguutaangilaq. Taamaalilluni najugaqarfittut neqeroorutit il.il. illutamikkut imatut aqqissugaappata, innuttaasup nammineersinnaangitsup najugaqarfimminit anilerneru sulisunit pisariitsumik takuneqarsinnaasunngorlugu, tamanna siunertamut naapertuutissaaq, taamaasilluni iliuusissat piffissaagallartillugu iliuuserineqarsinnaamata.

Imm. 6-imut

Kikkut tamarmik matunik ammaassutunik namminneq atuisinnaangitsut atuinissamut pisariaqartitaminnik ikiorneqassapput, innuttaasooq angerlarsimaffimminit anitsaaliugaaneq pillugu aalajangersakkamut ilaatinneqartoq pineqanngikkaangata.”

Paasisinnaavara Utoqqaat Illuanni aqutsisut sulisullu kissaatigimmassuk najugaqartut puigortunngortut nakkutigineqaratik aneerlutik ajoqusersinnaanerisa pinngitsoortinneqarnissaat.

Naatsorsuutigaaara matumik ammaassutit immikkut ittut pillugit pissaanermik atuineq pillugu inatsimmi malittarisassat Utoqqaat Illuata isiginiarumarai, najugaqartut Utoqqaat Illuannik namminneq qimatsisinnaanerit pinngitsoortinniarlugu iliuuseqarnissaq pisariaqartoq nutaamik nalilernerqarpat.

10. Utoqqaat Illuanni namminermi malittarisassat

10.1. Misissuiartortut misissuinermit Utoqqaat Illuanni namminermi malittarisassat pillugit assigiinngitsunik paasissutissinneqarput, ilaatigut pujortartarneq, piffissat pulaarfiusinnaasut imigassartorsinnaanerlu pillugit.

Taamaalilluni misissuiartortut naqitaaqqiamik Utoqqaat Illuanni nalinginnaasumik malittarisassanik imalimmik tunineqarput. Tassani pujortartarnermut malittarisassat pillugit ima allasimasooqarpoq:

“Utoqqaat pisinnaanerusut silamut pujortariartassapput/pitsorluttut iniminni pujortarsinnaapput matortik matullugu kiisalu igalaartik ammarlugu pujortartassapput.

Inatsisini allassimasoqarpoq utoqqaat illuat tamanit pujortartarfiunngitsoq.”

Utoqqaat Illuanni immikkoortortaqaarfimmi aqutsisuugallartup misissuinermi ilisimatitsissutigaa naqitaaqqiaq pisoqalisimasoq, najugaqartullu tamarmik isersimallutik pujortarsinnaatitaasut.

Eqqortussaq anguniarlugu oqaatigaara pujortarnermik inerteqquteqarneq pillugu Inatsisartut inatsisaat nr. 15, 26. maj 2010-meersoq ilaatigut paaqutarinniffittut angerlarsimaffinni il.il. pujortartarneq pillugu aalajangersakkamik imaattumik imaqartoq:

“**§ 5.** Paaqutarinniffittut angerlarsimaffinni, ulloq unnuarlu paaqqinniffinni, najugaqarfissatut neqeroorutini, ilinniartut ineqarfiini assigisaannilu inunnit 18-it sinnerlugit ukiulinnit arlalinnit najuqarfigineqarnerusuni namminerisamik angerlarsimaffittut atuuttuni najugaqartut ataasiakkaat 18-it sinnerlugit ukiullit ineeqqami inissiamiluunniit angerlarsimaffittut najugaqarfigisaminni pujortarsinnaapput.

Imm. 2. Paaqqinniffik paaqqinniffimmi sulisut najugaqartullu allat pujortanngikkaluarlutik tupap pujuanik najuussuinissaannut illersorniarlugit sunniuteqarluartunik suliniuteqassaaq. Paaqqinniffiup najugaqartut peqqusinnaavai sulisut ineeqqami inissiamiluunniit namminerisatut angerlarsimaffittut atuuttumi isersimatillugit pujortartaqqunagit.”

10.2. Piffissat pulaarfiusinnaasut eqqarsaatigalugit Utoqqaat Illuani aqutsisut misissuinermi ilisimatitsissutigaa piffissami ullaakkut qulingiluanii unukkut qulingiluanut Utoqqaat Illuannut pulaartoqarsinnaasoq, malittarisassarli tamanna aqutsisut akuersaagaannik malinneqanngitsoq. Aqutsisut taamatuttaaq ilisimatitsissutigaa Utoqqaat Illuanni nerinerup nalaani pulaartoqarsinnaannginnera pillugu allagarsiisoqarsimasoq, kisiannili aamma nerinerup nalaani pulaartut aneqquneqarneq ajortut. Misissuiartortut takusinnaasimavaattaq Utoqqaat Illuata isaariaata eqqaani allagarsiivimmi ullup qeqqa-

siortoqarnerata unnukkorsiortoqarneratalu nalaani pulaartoqarsinnaanngin-
neranik allagarsiisoqarsimasoq.

10.3. Kiisalu Utoqqaat Illuanni malittarisassani misissuiartortunut tunniun-
neqartumi takuneqarsinnaavoq Utoqqaat Illuanni imigassartorneq inerteq-
qutaasoq. Misissuiartortulli Utoqqaat Illuata initaasa alakkarthernerini paasi-
vaat allagarsiivimmi allagarsiisoqarsimasoq, ilaatigut ima imalimmik:

“Utoqqaat Illuanni najugaqartut putoqqaniutigalugu imigassamik atueqqusaan-
ngillat, atuissagunillu ineqartunut sulisunullu akornutaanngitsumik atuisinnaasa-
riaqarlutik.”

Najugaqartut misissuiartortunit oqaloqatigineqartut malittarisassanik paa-
sinninnerat aamma assigiinngisitaarpoq. Taamaalillutik najugaqartut marluk
ilisimatitsissutigaa Utoqqaat Illuata malittarisassai ima paasigitik imigassar-
tornissaq inerteqqutaalluinnartog. Najugaqartulli allap tamatuma paarlat-
tuanik oqaatigaa marlunnik immiaarartortoqarsinnaasoq.

Sulisuma ilaat Utoqqaat Illuata immikkoortortaqaarfimmi aqutsisorigallagaa-
nut misissuinerup kingornatigut sianerpoq, taassumalu ilisimatitsissutigalu-
gu Utoqqaat Illuani ataatsimoortarfinni imigassartorneq inerteqqutaasoq,
najugaqartulli namminneq inigisaminni imigassartorsinnaasut.

Utoqqaat Illuata immikkoortortaqaarfimmi aqutsisorigallagaata ilanngullugu
ilisimatitsissutigaa Avannaata Kommunia kommunimi utoqqaat illuinut ta-
manut atuuttussanik assigiissaartunik malittarisassaliorlutik aallartissima-
sut.

*Pujortartarneq, piffissat pulaarfiusinnaasut imigassartorsinnaanerlu pillugit
Utoqqaat Illuanni namminermi malittarisassat imarisaat Utoqqaat Illuata im-
mikkoortortaqaarfimmi aqutsisorigallagaanit oqaasiinnartigut saqqummiun-
neqartut oqaaseqaateqarnissannut pissutissaqalersitsinngillat.*

*Utoqqaalli Illuanni namminerimi malittarisassat naqitaaqqiani allagarsiussa-
nilu il.il. najugaqartut atuarsinnaasaanni assigiinngisiternerat pissusissami-
suunngitsutut isigaara. Taamatutaaq Utoqqaat Illuanni namminerimi malit-
tarisassani aalajangersakkanik malittarisassanit piiginnarnagit aqutsisunit
atuutsinneqanngitsunik peqarnera pissusissamisuuunngitsutut isigaara.*

*Avannaata Kommuniata kommunimi utoqqaat illuinut tamanut atuuttussa-
nik nutaanik malittarisassiornera paasissutissiissutigineqartoq malugaara.
Naatsorsuutigaa Utoqqaat Illuata naqitaaqqiat, allagarsiussat il.il. Utoq-
qaat Illuanni malittarisassanik eqqunngitsumik ersersitsisut tamatuma ki-
ngornatigut nutarterlugilluunniit piarumaarai.*

11. Malitseqartitsineq

Utoqqaat Illuat qinnuigaara nalunaarusiaq manna sulisunut, najugaqartunut
ilaqutaasunullu ilisimatitsissutigeqqullugu.

Utoqqaat Illuat aammattaaq qinnuigaara nalunaarusiap immikkoortuini 6-
imi, 7-imi 8-milu oqaatigisakka qanoq iliuuseqarnissamut pissutissaqaler-
sitsinersut uannut paasissutissiissutigeqqullugu. Utoqqaat Illuat qinnuigaara
paasissutissat taakku Avannaata Kommuniani ingerlatsivik aqqutigalugu
nassiuteqqullugit, taamaalilluni ingerlatsivik Utoqqaat Illuata oqaatigisai pil-
lugit oqaaseqaateqarnissaminut periarfissaqarsinnaaqqullugu.

Imm. 6-imi oqaatigineqartutut suliami annertunerusutigut kukkussuteqarto-
qarsimallunilu sumiginnaasoqarsimasoq isumaqarama Inatsisartut Inatsisi-
nut Ataatsimiititaliaat aamma Avannaata Kommuniani kommunalbestyrelsi
Ombudsmandi pillugu inatsimmi § 23 tunngavigalugu tamatuminnga nalu-
naarfigaakka.

Isumaginninnermut Inatsisinillu Atuutsitsinnermut Naalakkersuisoqarfik su-
liaq pillugu ilisimatinniarlugu aammattaaq aalajangerpunga.

Nalunaarusiaq manna 2019-imi ukiumoortunik nalunaarutinni ilanngunneqarumaarpoq, nittartakkakku www.ombudsmandi.gl-ikkut tamanut saqqummiunneqarumaarluni.

ILANNGUSSAQ

Avannaata Kommuniata nalunaarusiaagallartoq pillugu oqaaseqaatit imaatut uannut e-mailkkut 2. januar 2019-imeersukkut nassiuppai:

“Ombudsmandeqarfiup Qaanaami Utoqqaat illuannut nalunaarusiaanut tunngasoq

Qaanaami Utoqqaat Illuanni fg. afdelingslederusoq [...] peqatigalugu Ombudsmandip nalunaarusiaanut tunngasumik akissuteqarneq.

Siullermik Ombudsmandip uparuartorpa Utoqqaat Illuanni pissaanermik atuisinnaanerup tungaatigut akuerineqarsinnaanngitsutut isorisarialerujussuartullu uparuartugaanut tunngatillugu imatut akissuteqarusuppugut:

6.

Pissaaneq pillugu atuneq

Fg. afdelingslederusup paasisimavaa soorunami taamatut atuissagaanni immer-sugassaqartoq taamatullu atuinermi marloriarlutik immersugassaq atorlugu immersuisimapput, kisiannili nalusimavaat nutaaqartoq immersuiffissamik, taannalu pillugu Avannaata Kommuniani utoqqaat illuinut ataqatigiissaarisoq aqqu-tigalugu ujartuisimapput nutaamik immersuiffissamik pissarsiniarnermini, kisiannili ataqatigiissaarisup nassaarisinnaasimangilaa pissaanermik atuissagaanni atuereernermilu immersuiffissaq nutaaq, taamaasillutik maannamut nutaamik pissaanermik atuissagaanni atuereernermilu soqarnatik nalunaarutigalugu, taamaallaallu nutaajunngitsoq maannamut pigilersimallugu, taannalu inatsit pillugu annertunerusumik pikkorissaassutigineqartariaqaraluarnernik fg. afdelingsleder Utoqqaat Illuanni inissimasuusoq isumaqarluni, soorlu Ombudsmandip isumaqarfigigaa taassuminnga inatsimmik atuisussaasut (tassa) sulisut annertuumik ilisimasaqarfiginngikkaat taamatullu aamma oqariartuutigineqarluni “akuersaar-neqarsinnaanngitsutut isorisarialerujussuartullu”.

Isumaqatigiissutigivarpullu pissaanermik atuissagaanni sukumiinerusumik inatsit pineqartoq pillugu misissuinissarput.

9.

Matumi silarlarmi akkittaammik atuineq

Siullermik akkittaatit atorineqarsimagaluarpot taakkulu isumannaannerpaaq ator-niarlugu peerneqarsimappot matullu isorlerpaat qimaaffissiatut atorineqartus-satut maannakkut isigineqarlutik.

Puigortungortoq ataaseq matukkut taakkunatigut anisimavoq kamillaanngarlu qimmit tikilerai angumerineqarluni Utoqqaat Illuannut utertinneqarsimavoq, taa-maattoqariarmat akkittaatit atorunnaarsimavai.

Puigortunngortut taamatullu aamma najugaqartut taakku matut qanoq atorine-qartussaaneriniq ilitsersorneqartarput maannakkumut allaat, matut taakku naju-gaqartuniit ilikkarneqarsimalerput, puigortunngortullu eqqarsaatigalugit qalipaa-tilimmik ikkussisimappot sungaartumik, taannalu eqqaasittuarnerisigut ilikkarne-qarsimalluni asuli aniffissaanngineriniq.

10.

Utoqqaat Illuanni namminerimi malittarisassat

Ombudsmandimiit ilisimatinneqarneq suli pinngitsumi aqutsisuusut ilisimasi-manngilaat aatsaat kommunalbestyrelsimiit akuerineqaqqaartartussaagaluarne-riniq, soorlu assersuutigalugu aqutsisuusup nammineerluni aamma allamik mali-tassamik nivinngaasimasooq pulaartarneq pillugu, allallu malitassat suliarine-qarsimasut. Kisiannili fg. afdelingslederip ilisimasaqarnerulernermini suliasat tamakku eqqumaffiginerullugit suliniuteqarusulluni.

Ombudsmandip uparuartugaa allagarsiussami soorlu allassimasooq najugaqartut nerinerisa nalaanni pulaartoqaqqusaannginneranik oqariartuutigisaanut tunnga-tillugu ilisimatitsissutigivaa ukiumut pulaartartut assigiinngitsutigut isersinnaa-sartut soorlu assersuutigalugu ukiup qanoq ilinerani, upernaakkut aasakkullu pulaartoqarnerusarsimappot, ukiukkut pulaartoqanngingajattarlutik, ukiornerani pulaartartut maqaasinarsisarsimallutik.

Najugaqartut imigassamik atuisarnerannut tunngatillugu Qaasuitsup Kommuniu-nermi ajornartorsiutigineqarsimannikkaluartoq nutaatut ajornartorsiutigisalersi-mallugu ilisimatitsivoq, tassa Ilulissaniit Utoqqaat Illuanniit malitassat tungaasi-gut maleruutilersimallutik, soorunami allagarsiinikkut allassimasooqarpoq Utoq-qaat Illuanni imigassartortoqarsinnaanngitsoq, uani eqqarsaatigineqarluni isersi-

maartarfinni gangimi najugaqartunut akornutaasumik atuinissaq inerteqqutaal-
luni, taamaattorli ineeqqani najukkaminni allanut akornutaanngitsumik atuisin-
naallutik, taannalu maannakkut ajornartorsiutaanngitsoq ilisimatitsissugineqar-
luni.

Init arlaat pujortarfiusinnaasutut pitsorlunnerusuniit oqaatigineqarpoq, kisiannili
piginnaanerusut anillutik pujortariartartut, maannakkullu taamatut atugaqarlutik.

Qaanaami Utoqqaat Illuanni fg. afdelingslederiusup qilanaaraa Avannaata Kom-
muniani assigiinnerusumik utoqqaat illuini malitassaqaarnissaq taamatullu aamma
inatsisit atuuttut pillugit sulisut akisussaanagerusullu pikkorissarneqartarnissaat
pillugu.”

NALUNAARUSIAMUT MALITSEQARTITSINEQ

Avannaata Kommuniata inaarutaasumik nalunaarusiaq pillugu oqaaseqaatit ilaatigut imaattut uannut e-mailikkut 2. april 2019-imeersukkut nassiuppai:

“Ombudsmandip Qaanaami utoqqaat illuat pillugu nalunaarusiaanut akisut, immikkoortortaqarfimmi pisortaagallartoq [...] suleqatigalugu.

Ombudsmandip isornartorsiugaa siulleq tassaavoq pissaanermik akuerineqarsinnaanngitsumik isorisarialerujussuarmillu atuisoqartarsimanera, tamannalu massakut imatut akivarput:

6.

Pissaanermik atuisarneq pillugu

Immikkoortortaqarfimmi pisortaagallartup paasisimavaa pissaanermik atuissagaanni immersugassaqartoq immersorneqartussamik, taamaalillunilu immersugassaq taanna pissaanermik atuinerup kingornatigut marloriarluni immersorneqartarsimavoq, immersugassalli nutaap atorneqalersimanera eqqumaffigisimanagu, taamaattumillu immersugassaq nutaaq taanna Avannaata Kommuniani utoqqaat illuikut ataqtatigiissaarisumut ujartorsimavaat, ataqtatigiissaarisulli immersugassaq pissaanermik atuneq sioqqullugu pissaanermillu atuinerup kingornatigut immersugassaq nassaarisinnaasimanagu, nalunaarutigisimallugulu nutaaq piginagu, pisoqarli kisiat pigalugu. Utoqqaat Illuanni immikkoortortaqarfimmi pisortaagallartoq isumaqarpoq inatsit pillugu pikkorissaasoqartariaqartoq, Ombudsmandimi isumaqarpat sulisut inatsisip atornissaa nalugaat, soorlu “akuerineqarsinnaanngitsoq isorisarialerujussuarlu”-mik oqarnermikkut.

Pissaanermik atuisarneq pillugu inatsit sukumiisorujussuarmik misissoriarlugu isumaqtatigiippugut. Taamaattumik paaqqutarinninnermi sulisori- neqartunik pissaanermik atuisarneq pillugu ilitsersuineq aallartinneqarsimavoq, tamatumunngalu peqatigitillugu qulequtaq pillugu naalakkiut sulisunut akisussaasunut agguanneqarsimalluni. Suliniutit taakku piviusun-

ngortinneqarsimanersut paasiniallugu nakkutilliinermut atatillugu misisuiartortoqassaaq.

9.

Matup silarliup akkittaatilerneqarsimanera

Akittaatit matuni siusinnerusukkut atorneqarsimapput, taakkuli isumannaallisaaneq pissutigalugu peerneqarsimallutik, massakkullu matut silarliit qimaaffissiatut atorneqartut isiginiarneqarput.

Najugaqartoq puigortunngortoq matut ilaatigut kamillaanngalluni anisimavoq, qimillu tikilerai takuneqarluni utoqqaat illuannut oqqunneqarluni, taamaattumillu akkittaatit atorneqarunnaarsimallutik.

Matut qanoq atorneqarnissaat puigortunngortunut najugaqartullu sinnerinut ulloq manna tikillugu ilitsersuutigineqartarpoq, taakkulu matut qanoq atorneqarnissaat ilikkarsimavaat, puigortunngortullu eqqarsaatigalugit qalipaataat sungaartoq atorlugu mianersoqqussutit ikkussuunneqarsimapput, taakkulu uteqattaariffigineqarnermikkut ilikkarpaat taakku anisarfittut atorneqassanngitsut.

10.

Utoqqaat Illuanni namminerimi malittarisassat

Illumi namminerimi malittarisassat kommunalbestyrelsimit akuerineqaaqaartussaaneerat pisortaqatigiit Ombudsmandi paasissutissiingikkallamat eqqumaffigisimanngilaat, soorlu pulaartarneq allallu pillugit malittarisassat pisortap nammineq suliarisimagai. Immikkoortortaqaarfimmili pisortaagalartup suliaasaqarfik taanna pillugu ilisimatitsinerup kingornatigut tamanna eqqumaffigineruniarpaa suliniuteqarfiginiarlugulu.

Nerinerup nalaani pulaartoqaqqusinninnermik allagartaliusaaq Ombudsmandip aamma isornartorsiorpaa. Pisortap taamaalilluni oqaatigaa ulluklut piffissani assigiinngitsuni pulaartoqarsinnaasartoq, ukiullu qanoq ilinera apeqqutaatillugu. Pingaartumik upernaakkut aasakkullu pulaartoqarneru-

sarpoq, ukiuunneranili pulaartoqanngingjavittarluni, taamaattumillu ukiuunerani pulaartussaaleqisoqartarluni.

Najugaqartut imigassamik atuinerat Qaasuitsup Kommunianut nuunnerup tungaanut ajornartorsiutaasimangilaq, Ilulissanilu Utoqqaat Illuanni mallittarisassat imaaliinnarlugit atorneqalermata tamanna nutaamik ajornartorsiutaalersimalluni. Utoqqaat Illuanni imigassartortoqassanngitsoq allagartani soorunalimi allassimagaluarpoq, eqqarsaataasorli tassaalluni isersimaartarfimmi torsuusaniluunniit imigassartortoqassanngitsoq, taamaaliorneq najugaqartunik allamik akornusersuisarmat, taamaattorli najugaqartut ineeqqaminni imigassartorsinnaapput ineqartut allat akornusersornagit, tamannalu ajornartorsiutaasimangitsoq paasissutissiissutigineqarpoq. Pitsorluttut pujortartarfeqarput, pisinnaasulli silamut anillutik pujortariartartarput, tamannalu manna tikillugu atuuppoq.

Avannaata Kommuniani utoqqaat illuini tamani assigiiaarnerusunik mallittarisassaqaalernissaa Qaanaami Utoqqaat Illuanni immikkoortortaqarfimmi pisortaagallartup qilanaaraa, taamatullu aamma sulisunik pisortaqatigiinillu inatsisit atuuttut pillugit pikkorissaasoqarnissaa qilanaaralugu." (Ombudsmandeqarfimmi nutsigaavoq)

Nalunaarusiami imm. 7-imi 8-milu oqaatigisakka qanoq iliuuseqarnisamat pissutissaqalersitsinersut kommunip paasissutissiissutigisimangikkaa Avannaata Kommunianut e-mailikkut 5. april 2019-imeersukkut malugeqquara. Ilassutaasumik oqaaseqaatit ilaatigut imaattut Avannaata Kommuniata uannut e-mailikkut 28. juni 2019-imeersukkut nassiuppai:

"7 pillugu.

Aalajangiinerit pissaanermik atuinerat tunngavittut

Pissaanermik atuisarneq pillugu inatsit tamarmi ilisimaneqartoq siunissamilu najugaqartunut pissaanermik atuisoqalinnginnerani aalajangiisoqareertarnissaa qulakkeerneqassasoq utoqqaat illuanni immikkoortortaqarfimmi pisortaagallartup uppersarpaa.

8 pillugu.

Pissaanermik atuinermik nalunaarutiginninneq

8.1 pillugu. Matumuuna uppersarneqarpoq nalunaaruteqarnermi immersugassat nittartakkami Naalakkersuisut.gl-imiittut Qaanaami utoqqaat illuata siunissami atortarniarai, taakkualu ilitsersuut malillugu tunniunneqarfissaannut eqqortunut nassiuttarniarai.

8.2 pillugu. Utoqqaat illuini tamani assigiiarnerusunik malittarisassaqa-lernissaa ilitsersuuteqalernissaalu Avannaata Kommuniata suliniutiginiarpaa, ilaatigut pissaanermik atuisarnej pillugu malittarisassat atuuttut sulusunut pisortaqatigiinnullu pikkorissaatigineqartarnissaat aamma eqqarsaatigalugu, taamaalillutik immersugassat peqqissaarnerusumik immersorneqartalersinnaaqullugit." (Ombudsmandeqarfimmi nutsigaavoq)

Avannaata Kommunian allakkatigut 1. juli 2019-imeersutigut nalunaarfigaara kommunip oqaatigisai maluginiarikka, Qaanaamilu Utoqqaat Iluanni misissuineq pillugu suliaq inaarlugu suliarineqartutut isigigiga.

Kommunimut allakkama taakkua assilinerat Qaanaami Utoqqaat Iluannut ulloq taanna nassiuppara.